


# Háteigur



12. árgangur 6. tbl.

29. maí 2008

## NJÓTUM ÍSLENSKA SUMARSINS

<http://www.hateigsskoli.is>

### Frá skólastjóra

Ágætu lesendur

Nú er þessi vetur senn á enda og sumarið kallar. Þetta hefur verið viðburðaríkur og árangursríkur vetur og margir sigrar unnir bæði stórir og smáir. Háteigur hefur borið ykkur fréttirnar í vetur eins og 12 undanfarin ár. Það er ótrúlegt hvað tíminn er fljótur að líða og ég minnst þess þegar við byrjuðum að gefa fréttabréfið okkar út og sáum mánaðarlega útgáfu sem framtíðartónlist eins og stundum er sagt. Háteigur er ekki lengur framtíðartónlist heldur lifandi hluti af skólastarfi Háteigsskóla og það er ekki síst að þakka ágætum ritstjóra okkar hversu vel þetta hefur gengið undanfarin ár.

Það er ekki af ástæðulausu sem hugur minn tekur sögulega sveiflu. Um miðjan nóvember verður skólinn okkar 40 ára í þessu skólahúsi. Við hyggjumst gera okkur glaðan dag og draga sögulegt efni fram í dagsljósið. Háteigsskóli á sér óvenjulega sögu því að hann er samfinn sögu kennaramenntunar á Íslandi og með nokkrum rétti má rekja sögu hans aftur til ársins 1908 því að um leið og Kennaraskólinn við Laufásveg tekur til starfa þá er stofnuð æfingadeild við skólann. Sjálfsagt má færa að því einhver rök að æfingadeild hafi ekki verið skóli í venjulegum skilningi en það er þessi æfingadeild sem verður svo að Æfinga- og tilraunaskóla Kennaraskólans í núverandi húsnæði 1968. Það er ekki fyrr en 1997 þegar skólinn fær nafnið Háteigsskóli að fólk hættir smátt og smátt að kalla skólann Æfingadeildina. Eldri nemendur sem sóttu Æfinga- og tilraunaskólann og jafnvel þeir sem sóttu Æfingaskólann eins og hann var kallaður eftir 1988, töluðu um skólann sem Æfingadeild. Þetta segir hluta af hinni dramatísku sögu skólans því að í allmörg ár stóð til að leggja skólann niður sem slíkan og láta nemendur sækja aðra hverfissskóla í nágrenninu. Þegar grunnskólarnir fóru alfarið yfir til sveitarfélaganna 1996 var ljóst að það þyrfti að starfrækja hverfissskóla hér í hverfinu og þá var tekinn af allur vafi um tilvist skólans um leið og hann varð einn af skólum Reykjavíkur. Þá var sögulegur fundur í sal skólans þar sem því var lýst yfir að skólinn yrði með þeim fyrstu í einsetningunni sem þá var fyrirhuguð í Reykjavík.

Það er margs að minnast og mikilvægt að við tökum höndum saman og söfnum gögnum í sögu skólans. Við sjáum fyrir okkur að afmælisdagurinn verði hátíðisdagur í skólanum þar sem við fræðumst um sögu skólans, höfum hátíðardagskrá í salnum og höldum veislu. Við notum tækifærið og fögnum tilvist okkar frábæra skóla.

Í þessum Háteigi er skóladagatal næsta árs og vil ég minna á að í haust verður 5 daga vetrarfrí og þar með ekki vorfrí í febrúar. Þetta er þá annað árið í röð sem við verðum með 5 daga vetrarfrí í stað þess að skipta því. Við tókum þessa ákvörðun m.a. út frá athugun okkar á viðhorfi foreldra. Mikill meirihluti var fylgjandi vetrarfríum en spurningin um hvort það ætti að vera tvískipt eða í einu lagi fékk jafnmarga fylgjendur. Við vonum að aðstandendur barnanna geri strax ráðstafanir til að nýta sér vetrarfríð með börnum sínum.

Þegar pistillinn er skrifaður er ekki búið að ganga frá ráðningu þeirra umsjónarkennara á miðstigi sem við höfum verið að auglýsa eftir. Vonandi getum við upplýst foreldra við skólaslit bekkjanna 6. júní.

Um leið og ég óska öllum gleði og góðs gengis í sumarsólinni þá óska ég eftir því að lesendur Háteigs láti það berast að afmæli skólans standi fyrir dyrum í haust. Gott væri að velunnarar skólans hugsi til okkar ef þeir búa yfir einhverju sögulegu efni, hvort sem það eru upplýsingar eða ljósmyndir úr starfi skólans.

Gleðilegt sumar,

Ásgeir Beinteinsson, skólastjóri

### Skipulag síðustu daga

Á blaðsíðu 3 í Háteigi er skipulag síðustu daga ásamt skólaslitum sett upp í töflu. Mikilvægt er að nemendur mæti tímanlega þessa daga eins og aðra og séu klæddir til útveru.

### Minnisatriði við lok skóla.

- Skila þarf öllum bókasafnsbókum strax.
- Nemendur eiga að skila öllum endurnýtanlegum námsbókum. Foreldrar eru beðnir um að leita sérstaklega vel að bókum, bæði gömlum og nýjum.
- Skila þarf skápalyklum sem allra fyrst eða fyrir 8. júní.
- Í óskilum er hjá okkur ýmis föt, skór, íþróttadót og fleira. Það sem verður ekki sótt fyrir 10. júní verður gefið Rauða krossinum.

### Trölilið mitt

Einu sinni var Hrafnhildur að kenna okkur að búa til tröll úr trölladeigi og það var gaman. Við þurftum að bíða í marga daga eftir því að það þornaði. Trölilið mitt var lítið og það var herramaður og við settum hár á hann og hárið á honum var svart.

Róbert Orri Gunnarsson, 1. bekk

## Hvatningarverðlaun

Hvatningarverðlaun Leikskólaráðs Reykjavíkur voru afhent við hátíðlega athöfn í Höfða 21. maí. Eitt þeirra verkefna sem hlaut viðurkenningu að þessu sinni var þróunar- og samstarfsverkefni Háteigsskóla og leikskólanna Klambra, Nóaborgar og Stakkaborgar.

Verkefnið sem nefnist „Skilaboðaskjóðan“ fólst í því að nemendur 2. bekkjar í Háteigsskóla og elstu börnin í leikskólunum unnu verkefni í tengslum við ákveðin viðfangsefni. Þau fluttu síðan afrakstur vinnunnar á milli skólanna í svonefndum skilaboðaskjóðum. Unnið var með ævintýri, árstíðir og fólk á fjölbreytilegan hátt. Börnin fluttu m.a. leikrit, sýndu brúðuleikhús, sögðu ævintýri, sungu og sýndu eigin myndverk. Verkefnið tókst vel og nutu börnin jafnt sem kennarar skólanna þess að vera þátttakendur. Jóhanna og Ragnheiður, umsjónarkennarar 2. bekkjar

## Dagar á „Fljúgandi teppi“


Dagana 27. og 28. maí var svokallað menningarmót haldið í sal Háteigsskóla. Þátttakendur voru skólaliðar af erlendum uppruna við Háteigsskóla og nemendur 5. EVÓ og undirbjuggu Ragnheiður í móttökudeild og Kristín R. Vilhjálmisdóttir á þjónustumiðstöð ásamt Elínu V. Ólafsdóttur kennara verkefnið með þeim.

Mótið fór þannig fram að skólaliðarnir og börnin kynntu sína menningu hvert fyrir öðru. Í 5. EVÓ eru fulltrúar 9 landa og í skólanum er starfsfólk frá 7 löndum og áhugamálin eru margvísleg. Á mótinu gafst tækifæri á að fá innsýn í marga menningarheima og að finna allt það sem er sameiginlegt. Nemendur, foreldrar þeirra og skólaliðar gátu ráðið hvað þeir komu með til að sýna hinum og gat það verið áhugamál eða uppruni, tónlist, dans, eitthvað að smakka, myndir, þjóðsögur, leikir eða hvaðeina sem þá langaði að kynna. Ferðast var á milli landa eins og á fljúgandi teppi og allir skemmtu sér saman.

## 20. maí 2008

Í dag fór 1. – 6. bekkur í Íslensku óperuna. Við sáum brúðuleikhús frá Berlín um sæskjaldböku sem heitir Purbi-jan. Hana langaði að kafa að hjarta jarðarinnar. Á leiðinni hitti hún kolkraþba, marglyttur, kínverskan arabafisk og tígris-hákarlín Sigurkarl Margleypa hinn Þriðja.

Tryggvi Kolviður Sigurðsson, 3. bekk  
Myndina gerði Halldóra Líney Finnsdóttir, 3. bekk



## Villi hamstur

Villi er hamstur sem ég á.  
Sætur er hann og loðinn,  
ljósbrúnn og snotur kallinn að sjá.  
Urillur er hann ósofinn.

Í búrinu sínu klífrar hann,  
nartar, nagar og hjólar.  
Mannasiði enga kann  
og sér ekki til sólar.

Stundum hann í kúlu fer,  
æðir eins og óður  
yfir allt sem í vegi er  
þeysir hann lafmóður.

Kristjana í 4. HHP og pabbi  
í heimavinnu um gæludýr

## Taka 2008

Á hinni árlegu stuttmyndakeppni grunnskólanna unnu þeir Atli Jasonarson og Daníel Gylfason í 9. bekk fyrstu verðlaun fyrir besta viðtalið í eldri flokki. Við óskum þeim hjartanlega til hamingju með það.

## Skólamyndatakan

Við hvetjum alla sem hafa spurningar eða kvartanir í sambandi við myndatökuna að skoða heimasíðuna þeirra [www.pixmyndir.is](http://www.pixmyndir.is) og senda þeim tölvupóst eða hringja á skrifstofutíma sem er auglýstur á síðunni. Athugið að það er engin skylda að kaupa mynd. Það má einnig hafa samband í síma 8983337.

Sigríður úr stjórnum foreldrafélagsins.

## Málsháttasögur

6. bekkjar voru að vinna með málshætti og áttu að semja sögur sem innihéldu þá.

Maja gerði þessa sögu:

Um daginn sá ég stráka sem voru að stríða öðrum strák. Þegar við komum inn þá sagði strákurinn kennaranum frá þessu. Kennarinn spurði hina út í þetta en þeir viðurkenndu það ekki. Kennarinn spurði hvort að einhver hefði séð þetta og ég rétti upp hönd. Kennarinn spurði mig alls konar spurninga og ég gat svarað þeim öllum. Þegar við gengum inn sagði hann, „*fleiri hafa augu en ernir*“ og fór að hlæja. Strákarnir þurftu að sitja eftir í skólanum. Þessir strákar höfðu alltaf verið að stríða og þurftu hjálp. Ég hugsaði með mér, *sá verður að bíða er bjóðendur á fáa*. En nú var komin helgi. Ég fór snemma á fætur og ákvað að fara að skokka. Þegar ég kom heim sagði pabbi, „þú hefur bara farið eftir málshættinum, *morgunstund gefur gull í mund*.“ Ég flýtti mér svo mikið að ég gleymdi næstum því öllu. Mamma varð reið og sagði við mig, „*sjaldan er flas til fagnaðar*“ og ég lofaði að ég myndi aldrei flýta mér svona mikið.

## Stuttmyndahátíð í dönsku

9. bekkur í Háteigsskóla las bókina „Min mund er lukket“ í dönsku og í kjölfarið var ákveðið að búa til stuttmynd út frá bókinni. Bekkjunum var skipt upp í hóp og í allt uppskárum við 8 myndir. Markmið þessa verkefnis var tvíþætt, annars vegar að þjálfar nemendur í hópavinnu og hins vegar að læra dönskuna á fjölbreyttan og skemmtilegan máta. Það reyndi mikið á nemendur í hópavinnunni og þeir þurftu svo sannarlega að spreyta sig á dönskunni en hver hópur þurfti að skila inn handriti á dönsku og að sjálfsögðu tala dönsku í sjálfri myndinni. Nemendur fengu frekar frjálsar hendur við gerð myndarinnar og mikill metnaður var í mannskapnum. Það var síðan sannkölluð stuttmyndahátíð í dönskutímum þar sem kennslustofunni hefði frekar mátt líkja við bíósal og ekki voru myndirnar sem sýndar voru af verri endanum. Einn hópurinn ákvað að senda sína mynd á kvikmyndahátíðina Hilmarinn og gerði sér lítið fyrir og sigraði í flokki um bestu myndina. Bekkirnir kusu síðan sín á milli um bestu myndina og bestu leikkonu og leikara. Það má samt með sannri segja að allir séu sigurvegarar því það er alls ekki auðvelt að búa til stuttmynd og hana á öðru tungumáli og þau eiga hrós skilið fyrir alla vinnuna sem lögð var í myndirnar. Erla Súsanna, dönskukennari Háteigsskóla

## Ferðasaga

10. bekkur í Háteigsskóla fór til Danmerkur þann 14. maí. Það er óhætt að segja að ferðin hafi verið stórskemmtileg. Við lögðum af stað í rútu út á flugvöll eld-snemma á miðvikudagsmorgni. Þegar komið var til Kaupmannahafnar um hádegi var töskunum skilað upp á farfuglaheimili og svo lá leiðin í Tívolí. Þar skemmtu sér allir konunglega eins og við var að búast. Hópurinn hittist svo aftur klukkan hálf sjö og fór út að borða saman á ágætis veitingastað þar sem þjónustan gekk hratt. Fyrsta kvöldið var nú heldur rólegt enda allir þreyttir eftir langan dag. Á fimmtudeginum hittust svo allir í morgunmat og svo komu dönsku vinir okkar úr Amager Lilleskole. Þau voru búin að skipta okkur í nokkra hópa og lá leiðin niður í miðbæ Kaupmannahafnar þar sem skoðaðir voru ýmsir merkir staðir svo sem Kristjánía og leiði H.C. Andersen. Þau buðu okkur síðan í siglingu um síkin. Okkur var svo boðið í mat heima hjá dönsku krökkunum um kvöldið. Morguninn eftir fórum við á vísindasafnið í Kaupmannahöfn og verðum við að segja að það er eitt skemmtilegasta safn sem við höfum komið á. Þar er hægt að gera alls kyns tilraunir og mælingar. Til dæmis er hægt að mæla viðbragð, snerpu og skriðþunga hjá sjálfum sér. Eftir hádegi var frjáls dagur og lá leið flestra niður í bæ að versla. Um kvöldið fórum við út að borða í litlum hópum á veitingahús að eigin vali. Morguninn eftir stóð valið á milli þess að sofa út eða drífa sig í búðir en við hittumst öll klukkan 2 á Guinness World Record safninu. Klukkan 6 lögðum við af stað á pizzastað sem kom síðan í ljós að hafði farið á hausinn eftir að við höfðum pantað borð fyrir um hálfu ári. Gengum við þá um miðborg Kaupmannahafnar í von um að fá eitthvað að borða. Á endanum fundum við ítalskan stað sem var til í að taka við 50 manns í snatri og gekk þjónustan mjög vel. Sunnudagurinn var mjög erfiður en við höfðum frjálstan tíma til kl. 5. Flestir fundu sér eitthvað að gera

og fóru sumir að skoða Kristjáníu, aðrir fóru í bíó og enn aðrir á safn. Ferðin heim gekk frekar brösuglega þar sem það var talsverð seinkun og biðin ansi löng. En alltaf getur maður skemmt sér ef maður er í góðum félagsskap og tóku nokkrir einstaklingar upp á því að opna lítið spilavíti á flugstöðvargólfinu við hliðina á innrituninni. Kennararnir og fararstjórnarnir eiga mikið hrós skilið fyrir frábæra ferð og voru eflaust dauðþreyttir eftir hana. Þó geta allir krakkarnir í 10. bekk verið sammála um að þeir hafa sjaldan skemmt sér betur.

Jenný Harðardóttir, Valgerður Bjarnadóttir og Sunna Mjöll Sverrisdóttir, 10. bekk.

## Tara litla

Tara litla er 3ja ára. Í dag þegar hún vaknar sér hún mikið undarlegt. Allur garðurinn hennar er með gulum blómum. Allur hvíti snjórinn hefur farið og bara gult og grænt eftir. Hún hlakkar ekki smá til að fara út og tína blóm fyrir mömmu. „Ég ætla ekki að borða morgunmatinn, mamma!“ hrópar Tara í náttfötunum. „Vááá...“ Töru finnst allt vera svo gult og fallegt að henni finnst það ógleymanlegt. Hún ténir risastóran vönd af gulum blómum. Tara heldur á blómunum og hleypur inn til mömmu. „Mamma! Hvað heita þessi blóm?“ „Má ég sjá? Ummm.. Já, fíflar“, segir mamma. „Mamma, þú ert leiðinleg!“ Tara er reið. „Hvað, af hverju?“ segir mamma alveg hissa. „Blóm eru ekki fíflar!“ öskrar Tara mjög reið. „Hvað ertu að bulla, litla mín? Blómin heita fífill og ef það eru fleiri en einn fífill þá eru það fíflar.“ Mamma er saklaus. Tara flissar og segir, „ó.. sorry“. Mamma lítur alveg hissa á Töru. „Hvar lærðirðu þetta orð, stelpa?“ segir mamma. „Hjá Ása litla hinu megin“, sagði Tara feimin. Lísu Phuong Anh Emmudóttir, 5. bekk



Spakmæli mánaðarins:



Stráðu sárindi í sand en góðvild í marmara.

	SKIPULAG SÍÐUSTU DAGA SKÓLAÁRSINS:				
	Mánudagur 2. júní	Þriðjudagur 3. júní	Miðvikudagur 4. júní	Fimmtudagur 5. júní	Föstudagur 6. júní
1. bekkur	Skóladagur	Óvissuferð kl. 10:10 – 13:00	Útivist á Miklatúni kl. 10:10 – 13:00	Starfsdagur	Skólaslit kl. 14:00
2. bekkur	Skóladagur	Uppskeruhátíð Skilaboðaskjóðunnar kl. 9:30 – 13:00	Útivist á Miklatúni kl. 10:10 – 13:00	Starfsdagur	Skólaslit kl. 13:00
3. bekkur	Skóladagur	Fjölsk. + húsdýragarður kl. 10:10 – 13:30	Útivist á Miklatúni kl. 10:10 – 13:00	Starfsdagur	Skólaslit kl. 12:00
4. bekkur	Skóladagur	Esjuhlíðar kl. 9:30 – 14:00	Útivist á Miklatúni kl. 10:10 – 13:00	Starfsdagur	Skólaslit kl. 11:00
5. bekkur	Skóladagur	Húsdýragarðurinn kl. 10:10 – 13:00	Útivist á Miklatúni kl. 10:10 – 13:00	Starfsdagur	Skólaslit kl. 11:30
6. bekkur	Skóladagur	Keila kl. 10:10 – 13:00	Útivist á Miklatúni kl. 10:10 – 13:00	Starfsdagur	Skólaslit kl. 10:00
7. bekkur	Fjallganga kl. 8:30 – 15:00	Nauthólsvík kl. 10:10 – 13:00	Útivist á Miklatúni kl. 10:10 – 13:00	Starfsdagur	Skólaslit kl. 9:30
8. bekkur	Prófásýning kl. 8:30 – 12:00	Ferðalag kl. 9:00 – 16:00	Nauthólsvík kl. 8:30 – 12:00	Starfsdagur	Skólaslit kl. 9:00
9. bekkur	Prófásýning kl. 8:30 – 12:00	Reiðtúr í nágrenni Hveragerðis kl. 8:10 – 15:00	Nauthólsvík kl. 8:30 – 12:00	Starfsdagur	Skólaslit kl. 8:30
10. bekkur	Prófásýning kl. 8:30 – 12:00	Leyfi	Nauthólsvík kl. 8:30 – 12:00	Starfsdagur	Útskrift kl. 17:00 Foreldrar sérstaklega boðnir velkomnir.

## **Skóladagatal**

Á bakhlið Háteigs birtist skóladagatal skólans fyrir næsta vetur.

Sérstök athygli er vakin á vikulöngu vetrarfríi, 20. – 26. október 2008.

### **Skýringar við skóladagatal:**

Skóladagar eru alls 180, 170 kennsludagar

og 10 viðbótardagar sem nýtast þannig:

Skólasetning 22. ágúst, foreldraviðtöl 7. október,

undirbúningur afmælis skólans 14. nóvember,

jólaskemmtanir 18. og 19. desember, foreldraviðtöl 3.

febrúar, vorhátíð 9. maí, útivistardagar 5. og 8. júní og

skólaslit 10. júní.

Starfsdagar eru fimm: 1. október, 2. janúar, 26. janúar,

25. febrúar og 9. júní.

Slóðin fyrir skóladagalið er:

<http://www.hateigsskoli.is/skdt0809.pdf>